

四庫全書

經部

欽定四庫全書

經部

春秋闕如編卷三

四

詳校官監察御史臣劉湄

給事中臣溫常綬覆勘

總校官中書臣朱鈐

校對官中書臣牛稔文

謄錄監生臣沈世玟

欽定四庫全書

春秋胡如編卷三

金山焦袁喜撰

莊公下

十有一年春王正月

夏五月戊寅公敗宋師于郟

宋再侵我公再敗之如曰我公甚武也來者則敗之
矣

秋宋大水

外灾也公使弔焉小善爾猶愈於已也

冬王姬歸于齊

亦使我主昏故王姬自我國而歸於齊也齊侯來逆不書者以謂是固宜來逆爾不足書也不如元年備書者彼別欲見義

新與讎國接

且其事已具於前此得畧

之也聖筆所裁不全錄魯史之文於園邸下已論之

矣

十有二年春王三月紀叔姬歸于鄆

莊之三年紀季以鄆入齊誑身事仇以存宗祀也四
年紀伯姬卒紀侯去國而紀亦遂亡矣叔姬來歸父
母國蓋七八年叔姬以隱七年歸於紀計其年可五
十餘矣自以身屬於紀義無他適紀之五廟猶存於
鄆又以齊桓之信義漸著異於乃兄不可近故志欲
往歸于鄆以終其未亡之身焉所以自明其身為紀
國之嫠婦而不以嫂叔相依為嫌者此其節為可嘉

而其志為絕可憫也故春秋既備錄伯姬之卒葬而併錄叔姬之歸鄫與其卒葬不以媵妾之卑而畧焉是亦可見史策所書原不限於一定之例而說經之家不能一一而得其情也書歸于與嫁同文上繫紀

不嫌其若嫁也

鄫尚屬紀不書歸于將何書而可乎

夏四月

秋八月甲午宋萬弑其君捷

公羊作接

及其大夫

仇牧

衛州吁宋督齊無知宋萬書法從同蓋隱桓莊時史

官之辭如此其後則變矣聖人因之無義例也既明
正是弑君之賊亦無假於他文以寄意也書及其大
夫三同於死君難書法不得而異也大宰督亦見殺
然固不待聖人而知其不可與仇牧連名書之矣說
見後傳

冬十月宋萬出奔陳

歷兩月而使得出奔誠為失賊然或力不能即討爾
未可深罪也宋人以賂求陳陳人始予之是宋無罪

罪在陳也書宋萬出奔陳明陳為逋逃主黨惡甚也
不書宋人殺萬愚所未詳豈以陳人歸萬以取賂故
不足書而但書宋人殺萬于出奔陳之下則似殺之
於陳地而非其實與闕疑焉可也

十有三年春齊侯宋人陳人邾人會于北杏

穀作齊人

齊桓始合諸侯以修伯業諸侯推齊為尊故先齊於
宋矣人者衆辭諸侯身自至亦得稱人或四國之中
有使卿來者不別言之爾時記注之辭多尚簡略勿

以褒貶求之

夏六月齊人滅遂

十年滅譚此又滅遂見齊桓圖霸之初必假威力其
後諸小國承奉齊命有若天威既自不犯滅者少矣
秋七月 冬公會齊侯盟于柯

自敗師長勺之後二國兩相猜憾故北杏之會魯不
與焉蓋齊亦不召魯亦不來也然齊欲圖伯未有可
釋魯者而魯斯時愈益心畏齊見諸侯親附齊漸衆

安能耿介自立取孤危之禍乎故於是焉而與齊侯
會得曹子之力取舊所失之田盟誓既定而退也桓
志在成伯功不念舊惡示之信義魯自是將一意從
齊國得小安矣

十有四年春齊人陳人曹人伐宋 夏單伯會伐宋

依左氏之說蓋宋人從北杏之會既而背焉故齊率
諸侯之師伐之又為請師于周示不敢專伐王者後
將假天子威靈以服之宋服即餘無敢畔者亦所以

尊周也周知齊桓欲尊已故為之命單伯帥師會伐以成其事三國之師已臨宋地單伯隨後而至會於宋也不戰者宋成也宋之不敢戰明也

秋七月荆入蔡

十年敗蔡師虜哀侯哀侯在楚齊桓行霸始為北杏之會蔡人背楚從齊故楚師入其國自是蔡常服於楚齊方有事於東諸侯不復問之直至僖四年始合諸侯侵蔡遂問楚罪成一匡之功其初年力有不贍

勢未能遽圖楚也詩曰無田甫田維秀驕驕齊其知之矣書者見蠻夷內侵其勢張甚齊桓中材但可如此安靜以養微陽是或一道爾

冬單伯會齊侯宋公衛侯鄭伯于鄆

春伐宋單伯會焉齊欲歸功天子故於此會為得宋故仍請單伯主之所以始終其事者也文與內大夫同蓋王臣不惟當尊亦須親之不外之宋公讓齊侯為先自此遂定霸主之位單伯在焉如曰此天子之

命也云爾

十有五年春齊侯宋公陳侯衛侯鄭伯會于鄆

四大國之君同推戴齊桓復為此會也魯史書之見
我尚未肯同諸國便爾下齊也陳先衛者陳近楚敬
其能遠他族親中夏故進其班所以獎來者其後亦
多用此法也

夏夫人姜氏如齊

自齊襄被弑夫人之不見於經者七年蓋夫人當齊

襄之世驅魯以親齊挾齊以威魯無事不與其間至
得志也桓公立而時移事變夫人非復昔日之夫人
矣安居於魯退閒而已至是復如齊者傳無其文難
可億逆然意其非直為寧兄弟而行也柯之盟魯雖
及齊平而中情殊未釋然諸侯再會郵莊俱不往齊
誠欲得魯而魯詎能終與宋衛陳鄭為異乎故夫人
復為此行者殆欲以彌縫間隙而成輯睦之功也夫
人其猶昔日之夫人矣

秋宋人齊人邾人伐郕

公作兒

鄭人侵宋

冬十月

郕屬於宋而叛宋齊既得宋因為宋討郕宋之郕即齊之郕也宋以郕從齊愈所以親敬齊也邾者郕之宗國也故從齊宋而伐焉宋方有事於郕而鄭人間之以侵宋矣甚矣諸侯之易動於利而伯主之約束有所不能周也鄭人侵宋曲在鄭可知也

十有六年春王正月 夏宋人齊人衛人伐鄭

宋鄭再同會而鄭旋背之有侵宋之事此而不伐何

以約束諸侯乎故齊為宋討之而衛人助之也宋序
齊上主兵也

秋荆伐鄭

鄭嘗服事楚矣至是鄭突自櫟入緩告於楚楚伐之
然楚之兵威從未及鄭緩告小失禮耳何乃遂見伐
邪蓋楚知與齊會必將畔已也故怒而伐之其志欲
與齊爭中國諸侯恐鄭去而附楚諸小國一旦皆携
貳焉爾伐鄭鄭之力猶足拒之故齊桓未暇營救而

楚師亦自退也桓二年蔡鄭會鄧始拒楚歷二十六
年而蔡蒙其禍又六年而鄭六受兵矣天生齊桓以
為之備雖其功績不足比於王者然亦所謂湯降不
遲者與嗚呼觀春秋之時勢如此猶謂聖人之於桓
文但有誅絕而無獎進者吾不信也

冬十有二月會齊侯宋公陳侯衛侯鄭伯許男滑伯滕

子同盟于幽

公羊會上
有公字
許男下有
曹伯

鄭既一意從齊而魯公亦于是往會也同盟者從其

載書之辭而錄之蓋不特宋公已下諸侯彼此同之
齊侯與宋公已下諸侯亦彼此同之此之謂大同者
也明諸侯同推桓為盟主然桓自以雖居方伯之任
與宋魯已下諸侯無小大等是天子外臣相與戮力
成安攘之功匪敢過屈王爵獨伸霸令故言同盟者
所以別於上下之文也既見此義即不須每會書同
矣蓋亦史氏之異辭策書之常例會者公也經文從
公羊尤省繁言曲說也

邾子克卒

即儀父也北杏之會服從齊桓漸同列國諸侯異於春秋之初矣於其來赴書邾子克卒子蓋其本爵前畧之故不言爾

十有七年春齊人執鄭詹

公羊作瞻

鄭詹自有罪故齊執之

明非為鄭不朝

秋書自齊逃來則此

是執之以歸不言可知也

夏齊人殲于遂

公羊作讖

齊滅遂而以兵守之慮其為變也至是四年矣遂之
因氏領氏工婁氏須遂氏饗戍者醉而殺之齊人殲
焉嗚呼遂之為國微矣國既滅則其君亦亡矣顧以
煨燼遺餘而能為此殄殲乃讐之舉既伸其志視死
如歸齊必殺之故云爾雖勢微力綿萬萬不能興復宗社以
比於少康之遺臣靡然以視夫豫子之三擊仇人之
衣而自謂足以報國士之知於地下者豈不為尤賢
乎哉嗚呼自古皆有死民無信不立遂雖亡有不亡

者存也春秋書齊人殲於遂所以深嘉遂人之義非
直為怒蛙之式而亦使當世莫大諸侯暴寡凌弱者
稍知懼也遂之所殺者於全齊九牛一毛耳而書辭
若此者為遂人增氣也如曰齊人竟殲於遂矣快之
也

秋鄭詹自齊逃來

齊執鄭詹未嘗釋也而苟自脫免以來故書逃賤之
盟幽已來獨鄭魯二國心尚欲背齊故詹不之他之

魯魯人受之嫌釁由此而生

冬多麋

舊有之今乃特多或害稼故書冬者自入冬來乃見

多矣不可以月

無忽然自少之理故知必久也

十有八年春王三月日有食之 夏公追戎于濟西

隱桓皆嘗與戎盟矣三十年之間未見有相侵犯之

事

伐凡伯未知即此戎否

是戎猶愈於諸夏之君也今而來侵

魯公自帥師追之始見魯之有戎患曰追戎於濟西

者如言已遁矣已遠矣不敢復來矣彼戎也勝負不足云也追之而已爾

秋有戩 冬十月

魯本無戩而今有之與上年多麋同是亦為異亦為災也日食多麋有蜮皆陰盛之象明天地之氣由人心人事相召致天象關天下物類生於吾國要之不可忽也故備錄之

十有九年春王正月 夏四月

秋公子結媵陳人之婦于鄆遂及齊侯宋公盟

公子結本為送女而出送女者欲媵陳人之婦送至
陳國也行至於鄆聞齊宋謀伐魯故矯魯侯之命及
齊侯宋公盟似若此行本為盟齊宋而來者所謂權
事之宜如弦高之犒秦師也本不出魯侯之命不得
書公子結及齊侯宋公盟于鄆故為書其送女為媵
之事如公子友之葬原仲此等不用見經者也所以
見經者因有所明故也鄆所盟之地也送女至鄆必

是與盟處尚隔遠故齊宋信之而與之盟也既為此盟即不復送女至陳別自使人送之以取信於齊宋而媵陳之好則不能兩全也陳人之婦者嫡也於魯為同姓之外女故得畧之也公子結矯命專行為安利國家起見亦是大夫出境之常事無所可褒亦不以遂事加貶但據當時情事之實而書之用見三國來伐之因爾

夫人姜氏如莒

杜氏所謂書姦者謂姦干典禮也

冬齊人宋人陳人伐我西鄙

齊宋信結之來而與之盟既而知其矯命責魯有二心陳人亦以勝送失歡故齊宋挈之來伐情或然也言鄙者兵纔及邊境內辭來伐而不言戰取成可知不言亦尊內之意也

二十年春王二

公作正

月夫人姜氏如莒

非父母國而一再如夫人之自恣甚矣書者見莊公

至是猶不能防禁良由失在初也

夏齊大災 秋七月

大國有災魯必使人弔之故書爾

冬齊人伐我

穀梁作我

齊桓攘外之功莫大於服楚此特齊魯間之戎爾一
加兵焉爾

二十有一年春王正月 夏五月辛酉鄭伯突卒

突始終稱鄭伯忽不得一稱鄭伯其見弑亦不書至

子儀并不見經矣。豈忽與子儀不成為君邪？春秋非備載列國事實之書，安得以書不書鄭伯不鄭伯而疑聖人之予此而奪彼哉？

秋七月戊戌，夫人姜氏薨。冬十有二月，葬鄭厲公。

鄭突內得重臣之力，外結四隣之援，出而復入，克守君位，然於卒也，國人加之惡謚。忽雖遇弑，猶謚曰昭，則當時之公議猶未泯於人心可知也。

二十有二年春，王正月肆大眚。

公作省

猶言大赦也。書者過也。雖有大過而麗於法者皆原宥之。蓋非常之恩。偶一用之。故書於策也。然終春秋之篇。獨此一見。豈魯更不復踵而行之。以悅人心邪。度亦一書之。以見例爾。春秋非魯之全史。愚固已言之矣。

癸丑葬我小君文姜

堯葬皆如國母。舊禮蓋夫人惡重。既為之諱。即不容有所貶損。以彰露其情。亦當日臣子事勢不得不然。

也歿皆美謚備極哀榮之典正當識其意爾小君者
臣子尊之同於君然謂之小則不得與外事亦可知
也

陳人殺其公子御寇

公殺
作禦

陳國有殺其公子之事書陳人者猶言彼國之人殺
之云爾不目其君者畧之也專殺大夫伯令之所禁
也公子親也殘其親甚矣公子無罪乎曰弑父與君
人人得而討之餘雖有罪專殺之罪也

夏五月

一時無事空書首月此誤也或月下有事而脫之

秋七月丙申及齊高侯盟于防

高侯齊貴卿來魯魯與之盟蓋前此來伐齊已取成於魯至是為防之盟所以釋舊嫌而期永好也盟不為圖婚婚豈須盟也及之者蓋公也

冬公如齊納幣

公如齊則似朝齊也如齊而納幣焉則非朝齊也重

婚事故也謀娶齊女又冒喪自行納幣直書之而三失俱自見

二十有三年春公至自齊 祭叔來聘

祭伯來祭叔來聘此等諸家並以意說之未知得失之所在也

夏公如齊觀社 公至自齊

前如齊為納幣也春而告至至此又如齊為觀社也亦告至若不書前之至即似納幣在齊至夏而觀社

于齊復書如齊觀者易惑故兩書至以明再如齊也
非以告廟故書其他不書者並不告廟也觀社者
齊因祭社蒐軍實公往觀之公之如齊別自有為托
觀社為辭爾書者見齊魯相親暱甚

荆人來聘

楚自十六年伐鄭勢益張矣去年楚成王弒兄自立
魯蓋使使賀之故此之來聘者所以報也亦欲行禮
於諸夏之國遠交而近攻此楚之情也魯史所不書

者甚多豈得但據經文以為說也不言其君使某者
初來接我畧之也

公及齊侯遇于穀

又假遇禮以會齊侯也

蕭叔朝公

公在穀而蕭叔就朝之不得受於廟故言朝公而已
秋丹桓宮楹

桓公廟也丹楹欲其輝煥

冬十有一月曹伯射姑卒 十有二月甲寅公會齊侯

盟于扈

扈鄭地柯之盟未相信也扈之盟相信深也文同而

意異其盟扈之事則不可以意而說之

明非為
婚事

二十有四年春王三月刻桓宮楹 葬曹莊公

以丹楹為未足也又從而鏤刻其楹以致崇飾焉所

謂非禮之禮

似是豐于禰廟近禮之
情故言非禮之禮矣

先儒以為夫人

將廟見故莊公為此以夸示之未知然否也

夏公如齊逆女

公親逆也女者齊女也方逆之不得奪彼國父母之辭而稱夫人所以別於天子

秋公至自齊 八月丁丑夫人姜氏入

公先告至而夫人後入也以其入我之國都稱夫人姜氏也從齊至魯公原不與夫人共載而行公自應先歸夫人從後而至矣然公先至而夫人以丁丑入是夫人稽留不即入也又入者不順之辭也難辭也

夫人姜氏何以不書至自齊而書入乎蓋以孟任故也莊公內取黨氏之女既許之為夫人則孟任固儼然夫人矣莊公年十四即位孟任之主內政而號夫人也蓋二十年矣然終以內取大夫女不得正稱夫人至二十一年間公欲親附齊齊亦喜於得魯于是始議取齊襄女為夫人然齊猶以孟任故有匹嫡之嫌數要公自行以嚴重其事異於凡常然後二十一年之主內政而疑于夫人者不得不退就媵妾之位

而莊公亦以齊女尊貴極致寵崇老夫得其女妻惟恐其稍不類乎正嫡元妃也而務加禮焉此所以如齊納幣如齊逆女丹桓宮楹刻桓宮栢累累書於史策者也鄭伯突入於櫟內有一鄭伯故也夫人姜氏入內有一夫人故也雖欲弗入安得而弗入乎謂書法一說取讐女為夫人不可以承宗廟故難之愚謂春秋之意固當在此而莊公爾時則恐其不復以是為嫌而謂哀姜之不見於廟者疑亦非當日之事實也

常事不

書爾

戊寅大夫宗婦覲用幣

既入之明日莊公使大夫之宗婦執幣以覲於夫人也女贄而用幣非禮蓋亦欲以侈觀爾書此終如齊逆女之事見公之婚齊如此其志之勤而文之備也

忘父讐之惡
不言自見矣

大水 冬戎侵曹 曹羈出奔陳 赤歸於曹

戎至是屢為中國患矣然痛者曰侵侵淺事爾一時

之間為日多矣經於此冬都不書月烏知戎侵曹而曹羈自以國亂出奔其事不必定在數日之內侵曹之下無文以隔之疑若羈為戎所迫逐矣若戎能迫逐其君必是入曹如狄入衛之事而經則但言侵也其非寇深可知赤當是曹之公子而代羈立者其為僖公以否未可知也諸家徒欲張戎之焰遂牽連為說至以赤為戎之自出而納赤以君曹妄造事端違闕如之義蓋漢儒之過也赤當云云左氏不詳羈赤

之事誰善誰惡又若為而言之

郭公

公穀連上赤
歸於曹為句

凡此之類聖人或有不知而後儒必欲知之過矣

二十有五年春陳侯使女叔來聘

陳來結好於魯蓋以季友故

杜氏註
得之

夏五月癸丑衛侯朔卒

六月辛未朔日有食之鼓用牲于社

凡書日食必有救日之禮常事不書此書鼓用牲於

社者以其變常書之爾

伯姬歸于杞

莊公女也不書來逆者蓋詳畧異文

秋大水鼓用牲于社于門

日食大水皆陰盛之災于社于城門皆求諸陰也伐鼓以號衆用牲以祈神莊公蓋從卜史之言而行此以應天地之變冀得勝之

冬公子友如陳

報女叔之聘也魯陳之好蓋公子友實為之內大夫
出聘書如者本為聘往此未見聘端書如而已與公
朝同例

二十有六年春公伐戎

公羊無
春字

夏公至自伐戎

戎為中國患故伐之

曹殺其大夫

羈出赤歸曹事不詳此言曹殺其大夫著曹有此專
殺之事而已他無可考也

秋公會宋人齊人伐徐

左氏古本無公字

蓋齊宋之君不自行魯會二國之大夫伐之以我主
兵為辭先宋於齊者史臣仍以王爵序不醇尊伯主
冬十有二月癸亥朔日有食之

二十有七年春公會杞伯姬于洮

穀梁一本或作洮

伯姬身至魯地會公而反其國疑杞國弱小見侵侮
於人故伯姬會公而求庇焉非為寧親來也顧不可
考爾公與內女會有似二君特異於常故存而不削

也

夏六月公會齊侯宋公陳侯鄭伯同盟于幽

陳鄭有貳心于齊齊不討而自服焉再同盟於幽所謂九合諸侯不以兵車者也書者見齊伯之成諸侯始疑終服兩與之

秋公子友如陳葬原仲

不書所事則是如陳者再聘陳也公命也今日如陳葬原仲則是公子私行也非公命也非公命者非謂

公子出而公不聞也請於公公許之而行猶謂之以私行也以私行者私事非公事也公子無譏乎曰公子之惡未之見也而見於此也公子相魯原仲相陳二人者交相得也故前年陳侯使女叔來聘始見相親暱之文公子之意然也次年公子友如陳報其聘公子之於陳也親暱有加也陳魯二君不得而與也公子借之以行其私焉爾故於是焉而遂如陳葬原仲原仲者公子之舊耳於魯侯無與也而書於策何

也公子有黨矣狡兔有三窟其公子友之謂矣公子慶父帥師伐於餘邱公子而凶悍者也公子友如陳葬原仲公子而陰邪者也皆國賊也魯欲勿亂不可得也

冬杞伯姬來

內女也先杞伯而來也內女歸寧豈勝書乎此蓋有求庇之事欲托魯以自安而不見其文也書在會洸之後來朝之前吾以是知之也

莒慶來逆叔姬

妃匹之合事隔千載雖傳有其文而情在可疑君子
闕之可以寡過

杞伯來朝

婦既在魯復身自來行朝禮也杞之為爵前後不同
諸家各以意說未知孰得其實也

公會齊侯于城濮

二十有八年春王三月甲寅齊人伐衛衛人及齊人戰

衛人敗績

再同盟於幽衛人不至所以來齊人之伐也齊桓自欲伐衛不以王命討衛也既敗衛而數之以立子頹之舊事又取賂焉情或然也齊人以甲寅之日伐衛衛人不服而與之戰至於敗績即此日也故書日在伐戰敗之上矣春秋無義戰彼善於此者有之若此之齊人伐衛則不成為霸討而無善之可言者與

夏四月丁未邾子瑣卒

比於克又稍近矣史得其日則日之爾

秋荆伐鄭

公會齊人宋人救鄭

公羊宋人下有邦婁人

前荆入蔡伐鄭齊桓未之能救也至是荆復伐鄭齊桓乃率諸侯之師以救鄭焉鄭無懼於荆則中國之情齊以安可知也荆嘗一聘中國矣至此猶不書公子元帥師者中國方外荆伯事方盛不以一接於我遂引進之而異其文荆猶荆人也聘不得單舉荆爾

冬築郿

公穀作微左氏郿亦作郿

大者曰城城郎是也小者曰築築郛是也一曰舊有邑而加城之曰城本非邑而築之以為邑曰築書者重民力

大無麥禾 臧孫辰告糴于齊

秋既無麥矣冬又無禾

此秋冬謂周之秋冬

故於歲終統書之

有收之極者曰大有年大無對大有而言謂不收之極也書大無麥禾起下告糴之事如言我國適大無麥禾是以卿佐自行為之告糴於同好之近鄰也假

而齊饑我國粟多即齊亦如是矣不足為甚恥也不
言公使者內大夫之常文非為諱也不言如齊告糴
者我以大無麥禾故須告糴爾於宋可也於鄭可也
不必於齊也今知其告糴之國則於齊云爾若乞師
之事則專主是國故言如而後乞也非彼緩而此急
之謂也至於畜積無素仰給他國失君國子民之道
則亦不待言之而自見矣

二十有九年春新延廡

新者革其故而新之延廐廐名所謂邦國六閑者是也或以延為廣謂新延其廐者未知然否也去年大無麥禾至告糶以濟乏而築鄒新廐工役繁興莊公在位日久何乃急於興作不知撙節愛養一至於邪以宋范仲淹在浙西時事推之古猶今也則莊之為此蓋亦以歲荒役民民得其食而事易以集上下交受其利耳然此既不可知正使果有所濟而修政廐民其權在我平日不務其遠者大者而勞民動衆以

求緩其須臾之死是亦孟子之所謂五十步而止者
爾謂春秋所書不以為譏而反以為美非愚之所敢
知矣

夏鄭人侵許

許偏於鄭鄭人固欲吞之許從楚鄭不敢伐今齊桓
大得中國諸侯而許猶未得與於會盟故鄭為之侵
矣不以伐而以侵者猶以楚故也

秋有蜚

言有者與蜮同

冬十有二月紀叔姬卒

卒於鄆也前書歸于鄆是鄆猶紀侯之國也此不得言卒於鄆也齊未嘗有鄆也

城諸及防

一時而城二邑功役重矣必言及者明諸防是二邑

彌

三十年春王正月

夏次于成

公穀次上有師字

秋七月齊人降鄆

成魯地近齊次於成未可知其為何也鄆蓋小國爾
降鄆者以兵力脅而下之春秋書齊人降鄆之類見
齊桓不施仁義所以為霸者之事又魯雖受命於齊
而國史書齊事不為隱諱尊敬之文猶若以周公之
靈治彼尚功利擅威命之罪焉

八月癸亥葬紀叔姬

紀侯大去其國紀侯之終也紀侯之卒葬不可知也
不得而書也是故大去而紀侯之事終也齊侯葬紀

伯姬伯姬之終也可以終紀事矣猶有叔姬存焉於是又二十六年矣紀季以鄫入於齊其存若亡非吾所問也叔姬則猶吾女也歸于鄫書卒書葬書葬紀叔姬叔姬之終也終叔姬所以終紀也蓋至是而魯之策書始不復見紀也嗚呼哀哉誰為為之是皆齊之罪也

九月庚午朔日有食之鼓用牲于社

冬公及齊侯遇于魯濟

會城濮遇魯濟其所謀之事不可知也探經下文為說合是無以說之爾疑事無質闕所不知可也時王為周故不得言周春秋魯史也不得言魯此言魯濟者杜氏云濟水在魯界者為魯濟故從衆人所稱書之爾

齊人伐山戎

言山戎以別於中國之戎也見齊桓攘外之烈為周宣六月以還所未有而伯主之不務德而勤遠畧其

失亦自見矣

三十有一年春築臺于郎

築臺以為臨觀之樂非急務可知興作之事無細大必書

夏四月薛伯卒

不書日不書名或史闕或以小國未同盟畧之滕薛俱降爵亦當闕疑凡此諸國雖不見來朝之文

謂在此公

之編而聘使往來亦容有之未必一向隔絕至是忽以

喪赴也經之所書什二三爾他故此

築臺于薛 六月齊侯來獻戎捷

齊伐山戎而大獲焉歸而分遺同盟之國用相誇示如曰方伯之威揚於遐外中夏之勢赫赫烈烈凡我同盟並受多福有如是也齊侯非自來也曰齊侯來獻者伸伯主之志所以為侈大之辭也不足於齊侯之意自在其中矣謂之獻捷者春秋之時行此等之事則以獻捷為名受其獻者因而書之非聖人特加

此字以寓貶抑也

秋築臺于秦

一歲之中築臺者三莊公之志果荒矣薛秦內地同他國名

冬不雨

建酉戌亥之月比於他時需雨澤為緩而陰陽之氣失於變調亦人君所不可忽者故書之

三十有二年春城小穀

小穀亦內地也

不用左氏之說

夏宋公齊侯遇于梁丘

東諸侯之國爵莫尊於宋地莫大於齊齊桓既伯凡為伯事舉會盟者諸侯推齊為尊聽其約束桓亦不復多讓其餘齊宋同事往往迭為賓主互相尊敬國史書會書遇亦先宋於齊不使伯主之尊疑於代興此春秋之微旨亦緣齊桓謙讓有其事故有其文非聖人一憑心意欲顛倒之則顛倒之也遇於梁丘者

宋輔齊以行伯事假遇禮而相與議也

秋七月癸巳公子牙卒

公子牙之死季友假莊公之命用計以酖之也不殺慶父而但除叔牙魯之亂本故在也莊公雖闇為計不若是拙也莊公必不以為是可以瞑目而無憂也然則酖叔牙者出於季友之志非莊公之命可知也季友何以酖叔牙謂慶父欲為君牙將為之殺子般也牙之心不可知其事則所謂莫須有者也牙未有

可殺之罪也季友以其罪加之也季友曷為以其罪加之而殺之曰是哀姜之人與已異趣者也苟可以除則除之而已也曷為不假莊公之命而用計以酖慶父不則及莊公授政于已之時而請命殺之或逐之而錮之豈慶父之桀黠有加于牙而季友自度其力有所不能而姑聽之邪是未可知也以吾觀之季友直未有意乎殺慶父也知慶父之必將弑般也季友非忠於般者也忠於般則以死奉般如荀息可矣

何為而出奔于陳也出奔于陳者度慶父之未能自取而必且立幼以擅政而為所得為也立閔矣不二年而又弑之皆非季友所屑意也閔弑則可以及僖矣於是焉而挾僖以奔邾也慶父弑二君其勢必不容於魯魯必將求君主魯祀者非僖而誰於是焉而以僖入於魯立為君而已遂相之也故季友之醜公子牙而不殺慶父者凡以心乎僖公而已僖公者成風之子也成風者於莊公在時私事季友而以其子

屬焉者也事之云乎吾不忍言也故季友者謂之忠於成風則可謂其忠於魯則未也吾故曰皆國賊也內君弑書薨此公子牙之死與弑事相涉故亦但書卒而已非為季友故也

八月癸亥公薨于路寢

薨於路寢薨之得其正者常事可以不書然不書則他公之不得其正者無以見之故為之錄其地所以重君父之終

冬十月己未子般卒

公穀作
乙未

慶父弑之也書法與好死者不異無文可以別之也
若桓公好死於齊亦但可書公薨于齊而已慶父弑
般欲自為之而魯人莫之與于是立閔也季友對莊
公之言曰臣以死奉般今般死矣一坏之土未封六
尺之孤安在季友但不與弑耳其負托之罪焉可逃
也季友不能如孔父仇牧之閑也亦且不能如荀息
之死也季友之心不在般也願以死奉云者欺其近

死之君而使之瞑目也季友之得罪於莊公甚也書
子者即位當年亦得言即位未踰年也書卒者降於成君也
不言殺者猶隱桓之書薨也不地雖好死亦不地也
降於成君故亦畧而不地也

公子慶父如齊

慶父嗾圉人犖戕子般於喪次而歸獄焉

公羊以為鄆扈樂者

與此犖是一人也此與公子翬之討寫氏相似而有不同者

寫氏之人本不殺隱而彊坐之若犖則慶父所使下

手之人也既歸獄有人慶父自以為無罪身執國命而內有哀姜為之主如季友首鼠之徒莫之敢誰何也但汲汲為自全之計而已於是慶父如齊以嗣君不祿更立先君幼子某告於伯主而求其無伐焉蓋不以出奔行而自同於出使之常國史因其事而書之不曰出奔而如齊也上書子般卒此但言公子慶父如齊不嫌文同於常竟使弑般一事全無所見者魯史別自有文春秋所書則見魯之臣子包藏禍心

公行無忌而季友之徒不免於黨惡之誅亦自有不可得而掩者矣若夫如齊而齊不問桓公之伯未嘗以討亂賊扶綱常為心此其本之不正而無以治人其去僖襄之為不能一間功利苟且之事見羞于聖門又何待言哉○慶父立叔姜之子以為是足以結驩於齊矣

狄伐邢

伐者興師問罪鳴鼓以進聲威大矣以狄而伐邢狄

之憑陵諸國禍患深重可知也不言狄是何種但知近邢者為狄而已難詳錄也

閔公

名啟方莊公庶子繼子般立立二年復為慶父所弑

元年春王正月

周惠王也不書即位者閔公既幼慶父如齊未反魯之臣子以子般見殺不為閔修即位之禮故若慶父

在魯或當如翬之相桓自同於嗣位之常矣假使如是而史書即位亦不當責閔無恩於先君者幼未有知故也

齊人救邢

齊桓以管仲之言而救邢仲之言曰寘安酖毒不可懷也則桓於爾時蓋亦勅於自行而勉一自行以從簡書其於方伯連帥之職未之能盡也書齊人救邢所謂美哉猶有憾者與

夏六月辛酉葬我君莊公

葬而後舉謚內君不書葬經無緣得見其謚國史自

有文不嫌畧之

如篇首隱公二字當亦是經文所有而不言者傳無明文又周王之謚亦

多不見魯史不以簡畧為嫌則內君亦當同之耳

子般之葬當在此後而不

書者春秋之常例也

秋八月公及齊侯盟于落姑

公穀作洛姑穀一本作路姑

慶父如齊以子般既死叔姜子當立告以說於齊齊

桓為是盟以定其位爾公及者內辭慶父雖已藏禍

心如故而在此時不得他有作為者亦以齊桓故也
齊桓實無心除魯之惡特以伯政在已鄰國有難不
得不以寧定為其事既有此盟魯亦自小憩矣

季子來歸

慶父弑子般季友出奔至是閔公嗣立且逾年季友
知其國內難稍定故來歸也書季子來歸者史臣從
國人之辭如言方慶父內比哀姜弑嗣君而謀篡奪
此時獨有季子不與其事超然遠引非復我國之人

矣而今乃復見其來歸也我國其有幸乎國人之志
以為閔公幼稚哀姜慶父之心居然可知得一季子
猶望其能保護之也而豈知季子之無意於閔一如
其無意於般而期月之間竟使閔為般之續也哉然
則季子來歸竟何為乎不重辜國人之望乎其後擁
僖嗣位宗社晏然遂以元勳自居而世世擅魯牢固
不可得拔非季子為之而誰為之乎聖人固仍舊史
有若深嘉樂予之文正見當年情事有如此者則季

子之罪通於天其亦不假他辭而見也矣出奔不書者書來歸則前出可知也

秋齊仲孫來

齊大夫來魯也經文甚畧其情其事不可以意而說之

二年春王正月齊人遷陽

遷者移徙其國都驅迫其人民使之失所亦陵暴之一事爾

夏五月乙酉吉禘于莊公

禘者有天下者之祭名非魯所得用而其來有自臣子所不議如初獻六羽前後僭用八佾並等諸常事不書此言吉禘於莊公者喪及三年實則只得二月而前後兩月虧少日數又不論也則是未可即吉而即吉介乎禮非禮之間

謂當時魯之臣子意以違吉祭不遠故從權而

行之如所云逾月則其善也之意故言介乎禮非禮之間非謂此五月吉禘中有一半合禮之實也故

謹錄之以其異於常爾

秋八月辛丑公薨

公羊作辛酉

卷三

慶父復弑之也左氏以為慶父使卜齮賊公於武闈蓋慶父欲篡魯所憚者齊桓耳今桓非不知已實殺般而不見討仲孫之來一如聘問之常初無詰責之事閔一孺子耳陰令人賊之而復以不祿告內有夫人為之主或者大事可成于是乃悍然而復動於惡此則齊桓雖無取魯之心明左氏之言未可信而所以致慶父之再行弑逆者由桓寬假之過亦不得而辭其責也

此段不言季友直不殺伯仁伯仁由我而死桓之謂以為不足復責矣與不地見實弑與隱同也

九月夫人姜氏孫于邾公子慶父出奔莒

子般之見弑齊桓雖不罪魯而落姑之盟實為閔公定其君位今而復弑之國人洵洵既甚於子般之時事跡彰露不可如何慶父哀姜將求庇於齊乎則恐其往而為戮也故夫人奔邾而慶父奔莒以為遁逃苟免之計此時季友如前出奔而以僖公適邾者至

是而季友之心以為吾可以立僖矣時哉弗可失矣

邾魯相去最近乘間而歸於事易也季友之力未必

能執慶父而誅之而心亦不以慶父為大惡

不然何以必為

之立後故托於親親之恩而使之得以脫然而去也夫

人貴也慶父微也

對夫人故曰微

故夫人言孫不敢以迫逐

之辭加之如曰夫人自孫去也慶父弑君之賊以罪

出奔則據實直書無庸梗避前弑子般經無所見而

此見者豈以成君為重邪非也弑未踰年之君與成

君同者聖人之心也其文或見或不見者史氏之辭
有可措筆有不可措筆惟其事之適然不可以此而

求其輕重之情也

公子慶父如齊全同無罪之文宜
弑般為無罪乎故知無文以見之

也莊元年夫人孫於齊夫人姜氏之文近在上年但

言夫人不疑非文姜也此之夫人姜氏不見久矣若

同文姜之文即不知此夫人是誰正使可知亦嫌太

簡史臣詳畧之辭自應有所異同者也

明非有削有
不削欲以見

意不書季友出奔者書之則若與於弑也

冬齊高子來盟

高子者齊之執政奉桓公之命而來欲定魯難也時季友已奉僖入立高子因與我盟以伯主之威定我國再世之亂結好而去也曰高子者從國人之辭如曰幸哉齊高子來盟云爾非聖人特筆不名假之華衮如諸家之說也僖公奔邾入立不書者臣子之辭以為我先君之公子自應繼統君有我國叔父之親大臣之重不得居從亡援立之功豈況鄰國君臣使

若得操廢置之權非所以尊內也故但書高子來盟
而其事亦自見矣

十有二月狄入衛

狄伐邢未已也又伐衛衛與戰人不用命至於大敗
狄入衛國滅君死焉列國之禍斯為劇矣不書伐戰
者以入為重也不言滅者衛復興也齊之伯於茲二
十二年矣而諸姬蒙禍猶有若是甚者見天下無道
陽德銷微雖有伯者不能大拯之以致然也

鄭棄其師

左氏傳及清人詩序其事詳矣春秋書之若何而書之邪如云鄭高克出奔陳則不見棄師之實但歸罪高克而已如云鄭高克帥師潰於河上亦是專罪主將之文也如云鄭伯使高克帥師次於河上弗召師潰而歸則以外諸侯之一事而累若干言以記之不亦煩而不殺乎然則鄭棄其師之一句舍是無可書者所以為聖筆也或亦得云鄭棄其師於河上而重

在棄師主將非人猶在所輕棄師之地豈所屑意故亦無庸於贊矣不責高克者鄭伯棄師足以為戒外臣有惡不暇責也書鄭此事者戎狄內侵諸國方蒙其毒而鄭之君臣乃復失道若此深為中國之憂疾如疾首聖人之情見乎辭○鄭文公本欲逐高克耳假命將禦狄以遠之全不以師為意是棄其師也師者聖人之所重今而棄之外大惡可知

春秋闕如編卷三

欽定四庫全書

春秋闕如編卷四

金山焦袁熹撰

僖公上

名申於閔公為庶兄公子季友立之在位三十有
三年卒

元年春王正月

王亦周惠王也書春王正月見不即位也下救邢則

亦此月之事爾

明春王正月之文不專為下事立

齊師宋師曹師次于聶北救邢

邢衛接壤同被狄難去冬狄入衛衛已迸散宋於衛近故宋桓為之立君於曹及此春齊桓來救會宋曹之師而衛之故都已為狄滅無及於事狄方得志於衛更欲入邢而三國之師臨於聶北邢人委其國而從之三國盛強驅逐狄人自然退去不用戰也次者恐師去而狄復來故宿留於此令狄望風知畏乃是

救邢之深者故書云次於聶北救邢也

明非譏其緩

狄入

衛而不書救衛者衛至是已渡河而南無所用救也
書救邢而不見狄伐邢之事者邢之罹患後於衛狄
未及入而救師至也齊桓之伯雖至公血誠不足言
而救邢攘狄之事實為至美或者猶疑其有養寇縱
敵之心無同患相恤之誼蓋亦未之思與

夏六月邢遷於夷儀

夷公作陳

三國之師雖次聶北然豈能長為邢戍而不去乎邢

都迫近於狄狄一旦復來度不能守諸侯又須來救則有不勝其勞者矣於是齊宋為邢計使之遷於夷儀以避之也蓋亦權事之宜無可譏者所謂邢遷如歸衛國忘亡二國之德齊桓可知也此亦是齊宋遷之而以邢自遷為文與宿陽等不同者邢欲遷甚非脅遷之也

齊師宋師曹師城邢

自正月次於聶北至是為邢城夷儀而定都焉蓋平

歲之久三國之師不離乎邢衛之境使其免於狄患而後去之此諸侯之所以深感齊桓而動吾聖人之

嘉歎者

謂論語
之文

誠有由也所以重序三國者明自正

月以來在此不去非他諸侯之師故也夫以齊之強桓公合諸侯之力或亦思深入狄境併力而攻擊之然其種甚多兵端一開未知所底而生民塗炭尤非仁人君子所忍言齊桓中材之主二帝三王非常之功聖人不以相責以謂衰微之勢苟得如此亦幸矣

此春秋之旨說者皆未免於太過也

秋七月戊辰夫人姜氏薨于夷齊人以歸

哀姜奔邾齊人怒其與大夫比而殺二嗣君奔在他國重為齊辱故召之歸行至齊地而迫令自殺也魯史為內諱故不書齊人殺之如曰我國夫人姜氏孫於邾將一載矣及是將歸其兄弟之國行至于夷而薨也薨在道齊人以其喪歸今方在齊也以歸如戎伐凡伯于楚邱以歸以蔡侯獻舞歸皆謂歸其國非

歸於魯也不言以喪歸既薨矣非喪而何也哀姜之惡殺之非過然猶不使霸討得加于內之小君者重凌侮之恥存隱惻之心不以惡人之故苟為快意之文與書文姜義畧同也

楚人伐鄭

鄭即齊久矣莊二十八年荆伐鄭賴齊桓合諸侯救鄭制其侵陵之勢至是且七年荆益強又與中國爭鄭而伐之春秋改書楚者以其交通中國漸與我相

接近始者但知彼之為荆而已今乃從其國號而錄之非復荒遠不常見於赴告之文者也若彼國革荆為楚定當不在此年亦未必不在春秋書荆之前但不可得知爾春秋所書若在一二年間忽有改易則觀者易惑今既隔遠知不嫌矣

八月公會齊侯宋公鄭伯曹伯邾人于櫟

公作打

齊桓以楚氛寢熾故為是會以堅諸侯之志欲其同心拒楚而不輕議伐者懼不服則損威也急於固內

緩於攘外此伯者之畧

九月公敗邾師于偃

公作纓穀一本作偃

僖公自邾入立邾蓋有奉焉至是邾來責賂而魯不與之故戰於偃而敗其師也所以然者邾為魯細其來已久僖公季友之意以為彼非列國之比也今乃恃其從會伯主而責賂於我興師境上德不勝怨是以敗之又櫜之會必邾子也獨書邾人是蓋魯史之文若不屑錄其君然凡此之類並是存其事爾彼此

曲直無足言矣

冬十月壬午公子友帥師敗莒師于鄆獲莒棼

鄆公作棼殺作

棼

慶父弒閔奔莒季友既立僖以賂求慶父於莒莒人歸之賂蓋未入於莒也至是莒人聞慶父已死興師來責賂季友敗其師而獲其將焉此與上公敗邾師並是閔僖間未了之案情事相類而有不同者公敗邾師不免谷風負德之譏故書詞從畧而季友獲棼

則以莒尤無狀而克獲有功為內之榮故文較詳也
魯之四鄰邾莒為小得相吞如便爾為之信義之衰
非一日矣敗邾獲莒何多怪乎吾故曰春秋亂世之
書比事屬辭其情可見是非曲直有不足細論者焉
十有二月丁巳夫人氏之喪至自齊

齊桓殺哀姜僖公請其喪而葬之不明正其罪以示
恩厚故至葬皆從常文無所貶也夫人氏者猶言女
子氏爾史氏之文亦容有所異同上既書夫人姜氏

薨於齊此則言夫人氏不疑非姜矣春秋於凡惡人不以一字為貶絕前夫人孫於齊及此夫人氏之喪諸家因史有異文強為之說欲於貶絕之中分其等級非聖意也

二年春王正月城楚丘

前年衛蒙狄難戴公廬曹卒文公繼世徙居楚丘魯奉伯令為城其國都其所同往之國不見於經有無不可知也齊桓先城邢後乃城衛者蓋當時勢有緩

急衛猶小能自立稍遼緩之不至於亡也要之皆是
齊桓絕美之事不應更以緩急為譏觀木瓜之詩衛
人之德齊如此則可以見矣城邢城衛並非諸侯專
封之事實與文不與之說亦無取焉

夏五月辛巳葬我小君哀姜

請其喪而葬之謚曰哀者蓋以國亂出奔道死非命
為可哀憫不正明其罪而絕之不特此也慶父雖受
誅亦但逼令自盡同諸無罪之人謚曰共仲與僖叔

同立後遂為三桓之祖凡此皆公子友所為原其本
意亦所以自托於其君也有罪且然況於定亂擁立
為社稷之臣者乎汶陽之賜費邑之封僖公之報德
已厚而季友受之吾知其無復謙讓之懷而陰圖子
孫之利也深矣

虞師晉師滅下陽

公穀下
作夏

并吞虞虢者晉志也貪璧馬之賂假之道遂從晉伐
虢滅下陽而虞亦因此自亡則是非晉為之虞為之

也晉不得虞不能滅虢故雖晉主兵而以虞先晉罪
虞之為晉用也晉之惡不待言也虞貪而愚實為可
憫春秋深惡晉獻故重責虞君若言汝雖至愚亦何
至於此極而令晉人得肆其毒乎愛之甚者恕之甚
怒之甚者罪之甚聖人之情何以異於人哉

明非惡
虞反加

于先晉不見於經見經始此晉自此益強馴至主盟
中夏若齊僖之啟小白矣

秋九月齊侯宋公江人黃人盟于貫

公羊作
貫澤

江黃素屬於楚齊桓威信既著遠人慕之而來服焉
桓方志在圖楚遂受之而合宋公以與其君盟使一
意從中國而後進而問楚罪可以不戰而屈之故是
時雖有夷吾之言而不暇於長慮却顧者欲以集吾
事而已

冬十月不雨

此當連下年見義書恒暘也建酉之月全然不雨其
戌亥二月或偶得雨雨必不多即是恒暘可知若一

時皆不雨則不應書十月若非恒暘但此一月不雨亦可不書也

楚人侵鄭

江黃楚屬也而服於齊故復為之侵鄭鄭終不敢背齊即楚故明年復見伐也

三年春王正月不雨 夏四月不雨

三不雨並書首時蓋三時之間天道恒暘動至經月不雨但中間或小有雨不能潤物故不書自某月至

某月不雨而亦不於仲季月書雨也一切養人之物
得雨而滋連時不雨為災可知有國有民者宜何如
憂念之春秋所書有煩而不殺者蓋聖人之意甚重
乎此也

徐人取舒

詩稱荆舒是懲則舒者楚之與國也徐人用師取之
東諸侯之服楚蓋亦得徐人之力云徐亦夷也以夷
攻夷始見於此其後如吳之入郢又其甚也

六月雨

至此始大得雨旱氣消也緣上恒暘故書此以結之
見旱不竟夏自此已後得雨不更書矣已月得雨苗
種賴之知此年不饑

秋齊侯宋公江人黃人會于陽穀

江黃之君復親至齊境桓與宋公會之而結好焉遠
人慕義棄楚即齊無貳爾心不須盟誓蓋齊桓至此
而服楚之勝筭不卜而可定矣江黃不書爵者楚尚

未得書子况其私屬投誠於我來者不拒去亦不追
人之可爾遑問其爵

冬公子友如齊涖

公穀作菴

盟

穀於子下有季字

陽穀之役齊桓重煩諸侯但與宋公為主會江黃之
君定為伐楚之計其中國諸侯如魯衛陳鄭等更須
盟以結之故前定為此盟而魯使上卿往受盟於齊
聽約束也陳衛諸國亦當同之外事不見也江黃不
盟者伐楚之時不欲使二國從已致受禍速也但不

得為楚用斯可矣

楚人伐鄭

三年之間楚三伐鄭鄭欲成矣以孔叔之言而止蓋
陽穀之會齊桓方謀伐楚鄭方受盟于齊心有所恃
知其可待故也

四年春王正月公會齊侯宋公陳侯衛侯鄭伯許男曹
伯侵蔡蔡潰遂伐楚次于陘 夏許男新臣卒 楚屈
完來盟于師盟于召陵

自莊二十八年荆伐鄭齊桓一合諸侯救之自此之後楚人與中國爭鄭一再加兵齊桓會諸侯於榿又盟江黃於賈又再會於陽穀其慮深矣其謀定矣至冬楚復伐鄭而後乃今連七國之師以伐楚前此寧為濡忍毋為輕發恐輕發之難收而適足以害我伯事之成也是役也本謀在于伐楚而先侵蔡者蔡自獻舞被虜以後僅一會於北杏明年荆入蔡嗣是蔡不復與中國會盟一向服從於楚而桓亦莫之問也

先其近者置其遠者姑棄蔡以予楚而不責其即夷
之罪以為吾欲責蔡則其事不容但已必湏與楚相
關不伐楚而但責蔡蔡此時唯能庇已者是從勢猶
不得比於鄭必且旋服旋畔則不如其已也故寧棄
蔡二十餘年不問直至伐楚之師出而義旗所指首
及乎蔡焉蔡有即夷之罪宜為鳴鼓之攻不以伐而
以侵者志不在乎區區之一蔡也以八國之師臨蕞
爾之蔡太山壓卵未足為喻所謂用牛刀以割雞其

志不在蔡也明矣纜侵蔡而蔡已潰矣蔡潰而遂伐
楚矣遂者繼事之辭有因此事生彼事非初意之所
及者有本欲行彼事先行此事而以次及之者皆得
以遂言之也伐楚則是聲其罪而討之楚之罪在無
王故以包茅不入為辭倔強僭竊皆在其中包茅縮
酒者所以為辭也豈真為此一物而已昭王不復者
周室先王之事南征不復疑若楚人弑之故以為問
其既死而遠者猶欲罪之則於今之共主而藐然無

所顧忌偃蹇自大不知天無二日土無二王之義者
當何如耶是亦所以為詰問之辭爾然不斥彼僭王
之非而但舉此為言者亦有說矣楚自熊渠稱王畏
厲王之威而去之及熊通以王號請于周周不許乃
自立為武王及茲又三世矣以齊桓之力不能使之
革去王號恪守子男之服也一旦以是責之楚必不
服不得受成則勢必用戰戰雖或可以勝而兵端一
搆荼毒生民未有攸底此固齊桓管仲之所不肯為

也故不得已而用其機權於辭嚴義正之中使之受其一而辭其一則彼之計較於利害曲直之間者自然出於行成之一策而我可以坐而收安攘之功矣聖人微管之歎固在於召陵之一舉而所以深嘉樂予者尤以其能不用戰也戰者聖人之所慎伐楚次於陘其庶乎得聖人之心矣楚未服罪故師行少進而次於陘既未得戰自當有止宿之地雖救邢之師猶不當使用為譏也况此之次陘尤所謂不疾不徐

者乃兵家節制之常春秋據事而書其為畏與非畏
無用言之必欲避畏之跡則如吳之入郢而可然而
飄風不崇朝驟雨不終日吾亦未見其能善勝也屈
完來盟言來者僖公在焉內辭也不言楚使者楚使
完來盟之定否未可得知春秋據內而言亦但知彼
國有人來此乞盟而已不問彼君之意若為不湏言
使然後見其非私來也完請盟於是為之退師一舍
次於召陵而後諸侯同與之盟示有禮於楚也夫以

楚之強恣而屈服行成則中國之威稍伸伯主之義亦著而自後之以兵相加侵敗王畧其曲全在乎彼有不待言矣又何多求焉楚亦非全畏齊正以不戰而退八國之師較之戰而能勝者利害相去甚懸況勝亦未易言也而亦心知齊之此舉必不多求於我不惜小屈以成齊桓之名其為謀甚善亦可謂彼有人焉也是故楚之為楚非一切荒裔之比也其世世與中國爭伯非偶然也君子以是知齊桓之持之重

施之怒而成功之難也許男卒不言於師者觀上下
之文則從可知也

齊人執陳轅

亦作袁公
穀並作袁

濤塗

諸侯俱盟召陵而退而陳之大夫何以獨見執也七
國之中陳鄭許於楚為近而國又弱於宋衛伐楚之
師本為勤鄭而出鄭德齊深倚齊重未敢萌畔齊之
心許男新卒方當以喪歸固不必言矣惟陳尤偏於
楚雖嘗從中國會盟而亦不敢開罪於楚今者大舉

伐楚陳侯勉從齊命蓋亦不得已矣其心以為楚蠻
夷也擇利而為之故有屈完之使諸侯既歸楚必且
修怨焉盟於何有修怨則陳首受禍齊其終庇我乎
是知棄楚即齊乃他國之利而非陳之利也故於其
師之方還而携貳之心見焉或以已不能終齊事若
南北兩事等情聞於齊桓桓為是執其大夫而一再
伐陳不如是則伯事又將敗也據經文所書其情自
顯至如誤軍道之說左氏公羊蓋皆失之後之說者

又以為齊志驕盈無故而執陳之大夫春秋書人以
貶者其亦弗思甚也與

秋及江人黃人伐陳

執袁濤塗本欲問陳侯之罪故秋遂伐之及者魯及
之也魯僖善事齊桓故使其微者會江黃之人而伐
陳也江黃亦請効力於中國以求齊之庇已而其國
於陳為近故從魯伐之其事便也江黃不敢得罪於
楚而倚齊之威則遂敢於伐陳然固不知齊桓之不

能庇已也卒取滅亡可悲也夫

八月公至自伐楚

葬許穆公

公作繆

僖公從齊伐楚魯人作頌以美大之夫子錄其篇不以為譏也親諸夏而禦四夷雖近於夸猶用為美談春秋於是役也以伐楚至豈非明示得意之文夫子亦從魯人之志而不之革者乎

冬十有二月公孫茲帥師會齊人宋人衛人鄭人許人

曹人侵陳

茲公作慈後同

秋伐陳陳不服故大合諸侯之人帥師侵之皆同伐
楚者也陳乃請成於是終齊桓之世陳不敢自外於
中國而楚亦莫之能害也則此年之一再伐陳蓋亦
伯事之不得而已者而非其過加侵暴於同好之國
也亦明矣叔孫氏帥師自此始外書人者皆其大夫
詳內畧外故但人之而已

不以人為貶

五年春晉侯殺其世子申生

晉以世子死狀告於諸侯謂世子實有不子之惡其

謀未成而情見勢窮至於自殺也然而晉獻之惡申生之冤流聞彰布於天下不假聽斷而得其情矣故據事而直書之所以為萬世之炯鑒前滅下陽此年執虞公晉方吞滅同姓日以富強而亂本既成天性之親自相屠戮晉事見經之始比而觀之亦可以知所戒懼矣申生之事與衛伋壽畧同而申生所處尤為無可奈何張子云無所逃而待烹是其恭也申生苟欲逃死晉獻必不能容則烏知其不更即于罪戾

而天下後世且不復憐之乎故以申生陷父於不義而為大仁之賊者此立教之言而非設身處地忠恕平允之論也

杞伯姬來朝其子

杞伯姬來非直來也朝其子也曰朝其子者以其子來朝於僖也曹伯使其世子射姑來朝是曹伯不自來也今伯姬挈其子以來則不得言杞伯姬使其子來朝也如言杞伯姬以其子來朝則文亦明矣春秋

變文言朝其子者嫌若伯姬偕其子而朝也朝非伯
姬事也故言朝者其子爾伯姬以莊二十五年歸于
杞至是十四年爾子方幼弱可知也所以朝其子者
蓋杞實衰微伯姬以其子求庇於僖而身率之以來
使之朝也其實未能成朝禮而情亦不同於他國之
但為朝而來者故其文不得不異也凡此皆當時
情事如此春秋因而錄之不切切然以明正典禮嚴
示隄防為筆削之意說者皆過也

夏公孫茲如牟

聘於牟也茲叔牙之子叔孫氏再見而仲孫氏後出者蓋慶父罪重未即任之

公及齊侯宋公陳侯衛侯鄭伯許男曹伯會王世子于

首止

公穀並作戴

王世子者惠王之世子鄭後立為襄王者也世子出會諸侯未有不得王命而自行者蓋齊桓伯功既盛召陵服楚之後愈欲乞靈周室以增伯主之重使諸

侯不敢背已而從楚焉故以尊王為辭請於惠王使
世子代王出而已率諸侯會之世子稍失愛於惠王
是舉也雖非王意然不得不許也於是王世子為
會主而齊宋以下往會焉不純行君臣之禮不得言朝者
避天王也殊會者明世子尊諸侯不敢與之為匹敵
也尊世子所以尊王也晉文踵其事而加甚焉故有
河陽之狩在齊桓猶為念深禮謹要其意則一而已
矣齊桓之召諸侯不以定世子位為名然世子亦自

定矣如以定世子位為名而顯然與天子抗衡則何以服諸侯而鄭伯懷貳春秋何以書逃歸乎蓋齊桓此舉一物而三用之尊王室一也崇已威二也定世子三也此伯者之略功過皆有之也書公及者下有會王世子文不得言及也首止衛地世子出不為甚遠亦不得在畿內者嫌諸侯近王不朝過門不入非所以崇敬也

秋八月諸侯盟于首止

諸侯即會王世子之諸侯齊侯也宋公也魯侯也陳侯也衛侯也許男也曹伯也諸侯自相為盟不敢與世子盟也盟者示之以信猶所謂有如皦日者也示之以信者殆於不相信也王世子何人也盟曰必無相背負則是謂可以然也故夫諸侯可相為盟者以其相背負之事可以然也王世子不敢盟者王世子之於諸侯猶非所當疑也而况諸侯之於王世子乎然而王世子在焉而諸侯盟焉王世子固盟主矣不

言而喻爾此亦衰世之事而仲尼之所心惻者也

鄭伯逃歸不盟

會王世子於首止有鄭伯盟於首止無鄭伯鄭伯逃歸不盟也鄭伯不肯與是盟先是盟而去之也春秋魯史也首止之役僖公在焉以僖公之在則自王世子已下至於曹伯皆內也於是諸侯哆然曰鄭伯逃歸矣史氏承其意而書之所以深誚鄭伯如不齒之者凡以為內辭也合諸侯以會王世子既會而尋盟

乃至失一鄭伯亦非伯事之光彼王者之世不期而會八百今乃僅七國而去其一乎故不得不深誚鄭伯擯不與齒而曰彼其逃歸矣不盟矣深誚鄭伯者所以殺齊桓之恥也然則鄭伯無惡乎曰齊桓之伯雖未必有至誠懇惻之心然如此會其義正其言順其於天室之安危中國之盛衰大有所關係從之者為是則背之者為非或言王召鄭伯使去齊從楚故鄭伯中變而不肯與盟然諸侯在首止未嘗明奉王

旨則固不嫌於臣抗君子抗父也而鄭伯乃首鼠兩
端中道而背之去齊即楚不可以他辭解也據此逃
歸之文聖人之情亦從可知爾

所謂彼善於此

楚人滅弦弦子奔黃

安中國而遏寇亂者春秋之大義其於楚也一言以
蔽之彼哉彼哉而已隱桓之編不見於經至其敗蔡
入鄭大為中國患則書之所以起伯事見中國賴齊
桓其勢急也後且易荆而楚矣然於彼國蠶食之事

不與吾中國相關者天子諸侯既莫之問春秋亦畧而不書蓋無緣得書也至是書楚人滅弦弦亦南方微國也弦不事楚又不設備故見滅亦楚自蠶食其地爾所以書者以齊桓故也據左氏江黃道柏皆弦姻也方睦於齊弦子恃之以至滅亡江黃兩與會盟若道柏若弦烏知其不私事齊桓而經不見也今弦子國滅奔黃黃人能無懼乎懼而告於中國此其所以不得不書也然不書楚鬪穀於菟帥師滅弦而但

書楚人則猶畧之也外之也其後之從詳者勢不得而不詳也亦猶夫始之不見於經而後乃稍稍見也

傳所謂漸進者亦是此意非予之謂也然則齊桓不合諸侯以救之春

秋其有譏乎曰桓之伯僅足以庇陳鄭諸國然猶或畔而去之不能定也至於江漢之間則楚人方怪其涉吾之地而桓之力有所不及亦明矣召陵一盟因利乘勢使之不大為中國之患則桓之志已矣必欲率東方諸侯從兵革之役以與楚人決雌雄於我客

彼主之地談何容易也故寧棄之而不之問夫豈不欲折楚人之銳使小國得入其宗祊而他日可無伐鄭救許之紛紛哉力不足勢不能也春秋錄楚人滅弦弦子奔黃特以著楚人吞併之迹而於齊桓之身則褒貶之所不在以為責賢者備之義非所施於此也弦子不名者畧之爾有罪無罪不足言也

九月戊申朔日有食之 冬晉人執虞公

據左氏此年晉復假道於虞伐虢八月圍上陽十二

月滅虢虢公醜奔京師晉師還遂襲虞滅之而執其
君臣春秋於此但書晉人執虞公其餘皆畧而不書
何邪晉新見經於我若疏遠然彼所為相詐欺相吞
併之事不一一詳之則舉其重者一書之畧見事端
而已晉獻之不道極於此矣正不湏以大書謂滅虢滅虞
詳錄一無漏略而後為深著其惡也不屑譏者甚於
深譏之不即加刑者一刑不足以蔽其辜也春秋之
意正猶此爾乃若虞之見滅由其自取非晉人能滅

之是則誠然矣然豈有操刃殺人士師不一問其狀
顧取死者之尸而鞭之數其頑愚之罪而以為善聽
斷者哉是與于不仁之甚者也君子之為春秋宜無
有與於不仁者毋亦不察於經文詳畧之故而誤之
也歟不言以歸者虞無國也虞地皆晉有矣

六年春王正月 夏公會齊侯宋公陳侯衛侯曹伯伐
鄭圍新城

鄭逃首止之盟歸而從楚齊桓於是率諸侯伐之圍

其新城圍新城者非如宋人之圍長葛欲取其邑也
討鄭之罪於其新城焉圍之鄭服則去焉爾許鄭之
細也許固堅事齊桓猶不使之伐鄭所以愛許也
秋楚人圍許 諸侯遂救許

齊圍新城以討鄭則楚圍許以救鄭圍許齊不得不
救許而新城之圍自解此兵家之常非獨楚人之好
用詐而凌無罪之國也鄭已即楚而許不偕來楚人
亦以是而討之爾遂者急釋鄭而救許伐鄭可圖再

舉不救許則許必從楚非許之罪矣救許之師至而楚人自退諸侯亦便還此所謂交綏者也春秋錄此用見齊楚相爭之勢齊桓雖勤諸侯所遇實為勅敵經營數十載勢力才足相當王室綴旒於上小侯奔走於下歲有兵革之事生民安得帖然聖師微管之歎蓋傷匪風之發而幸一時之小憩猶之乎不得中行而惓惓於琴張牧皮之徒云爾如謂書伐鄭書救許乃至喜動聖顏知不然矣楚人圍許不言救鄭者

鄭外也不以救而幸之也內辭自應爾也

冬公至自伐鄭

此以伐鄭至者師本緣伐鄭而出救許非初意所及
輔成伯事救許不大於伐鄭故舉重而書蓋史氏之
辭不可以一例求諸家廣說其義互有中否當文見
之或從畧而不論云

七年春齊人伐鄭

伐鄭圍新城而移師救許還不更圍鄭者楚人為救

鄭伐許以諸侯師至而退若我更圍鄭即彼亦當更圍許矣故兩釋之而未竟伐鄭之事至此春齊桓不更煩諸侯而獨自伐鄭鄭背中國必得之而後已非凌弱暴寡之師比也楚不更來救者鄭自歸楚楚受之知非已所得有不復爭之

夏小邾子來朝

自齊桓之伯而春秋列國之局一變二邾皆受朝命列於五等而稱子矣蓋桓居方伯之尊其服從者皆

進其爵號以尊之使人知勸亦所以壯中國之勢而
誇耀於蠻夷也蓋禮樂征伐命德討罪之權並假天
子之命以行而實則自諸侯出若唐之藩鎮矣小邾
郟也

鄭殺其大夫申侯

申侯舊有寵於楚其在鄭也蓋導之從楚而逃首止
之盟齊再伐鄭鄭病殺申侯以說於齊情或然歟夫
上下相賊殺王者之大禁也臣弑其君罪在不赦其

君之無道與否不論也君殺其臣臣之有罪與否雖不同而專殺者春秋之所重故係以國而書殺其大夫以明王禁自非弑逆大惡則有罪與否固不嫌於同辭矣此春秋之大指猶禮制報服之意也係以國者擅國之謂君君不得曰非我殺之人殺之也不言君者恩降於世子母弟故不斥君以為殺也

秋七月公會齊侯宋公陳世子款鄭世子華盟于甯母

穀作甯母陸氏云公穀

本無鄭世子華四字

甯母之會左氏詳矣先儒疑經無鄭世子華四字意
其然也說詳集傳

曹伯班卒

公作般

公子友如齊

冬葬曹昭公

使上卿往聘也

八年春王正月公會王人齊侯宋公衛侯許男曹伯陳

世子欵盟于洮

公羊未有鄭世子華

甯母洮一再會盟左氏之說亦若有可疑者於集傳
論之王人天子之人不必定是下士然後書人序諸

侯之上事在不疑

不序齊侯上則將置於何處豈亦以強弱序乎

王人與諸

侯盟其為衰世事居然可知或時勢非獲已春秋不用為譏以此測聖人之情其可也以王人序諸侯之上而振振然稱齊桓之能尊敬天子抑何弗思之甚

鄭伯乞盟

乞盟者請受盟也謂之乞者鄭自以前逃首止之盟為罪而卑辭以請於桓如乞師之必言乞也史臣從其所自為辭而書之不變文言請者以王人蒞盟伯

主為政而僖公又在焉鄭新從楚來尊內而外鄭伯如曰前逃歸不盟今更乞盟矣所以抑彼而伸此明是會之得鄭也非故加以至辱之名如後儒之說也以乞盟為至辱則內諸侯既盟矣鄭伯來乞盟則諸侯當更與之盟但書乞盟從省可知也

夏狄伐晉

晉強國也與狄錯處兵戈相尋未已書晉事漸悉始外之稍稍內之

秋七月禘于大廟用致夫人

據左氏以為致哀姜也蓋僖公以小君禮葬哀姜殯廟赴同祔姑一切同諸夫人特以凶死於外有疑焉故遲至此年因禘祭而致其主於廟以正嫡配先君也致夫人不書此蓋以其有異於常而存之其用禘非禮春秋所不議說已見前矣

冬十有二月丁未天王崩

惠王崩襄王立

九年春王三月丁丑宋公御說卒

公穀作禦

宋桓之葬魯無不遣卿往會之理沒而不見蓋以宋子背殯出會既歸乃葬故畧之而不書不然則亦史文之缺而已

夏公會宰周公齊侯宋子衛侯鄭伯許男曹伯于葵丘
宰周公天子之三公也於王臣為最尊故不名不字
宋子襄公也背殯出會以喪行故書子宋本公爵輔
桓行伯而國大於魯衛故從本班也襄王始立內有

叔帶之黨宗社未寧桓為是會以翼戴天子鎮撫內外其事至重而不輕故以宰周公蒞之而宋子雖有新喪亦以身與會而不使卿攝也序桓之績召陵首止葵邱實為卓偉不可沒之適衰世有此紛紛如宰周公宋子之等雖變常典在所不譏蓋不暇譏也此被髮纓冠之義為春秋者不可不察宰周公不殊會者內莫尊於冢宰外莫尊於方伯公侯皆天子臣非若王世子有君臣相臨之義故得引而同之也

秋七月乙酉伯姬卒

蓋許嫁而卒為之服也

九月戊辰諸侯盟于葵丘

書諸侯盟見宰周公不盟也義與首止同但彼是世子在會而諸侯不敢與盟此是宰孔既會先歸諸侯尚在葵丘自相盟宰孔若在未知得盟以否夏但為會至此始盟則諸侯亦自不敢與宰孔盟可知也孟子稱五伯齊桓為盛葵丘之會束牲載書而不歃血

申明五禁毋得相犯孟子不道桓文而稱述之如此則知此葵丘之會為聖師褒二百四十二年之內不得不以小康見推也諸侯信桓之深盟而不軟者宋魯諸君久矣同心共事唯鄭則去來不常而上年乞盟實出鄭伯之志無復携貳之端亦由齊桓之義有以服之故不軟者非為他為得鄭之深異於前事也又按夏會葵丘歷三四月諸侯不離其地至九月乃復為盟非有伐國圍邑之事而久勞於外如此何邪

愚以是知此會之為翼戴新王填安內外其事至重且大而非徒為尋盟修好但假天子之命以自濟其雄伯之私而已也宰孔之致宋子之來其情事亦灼然可見矣桓盟不日蓋當時史臣以此為常不用書之獨此備日者或史臣見此盟有異他日因而記之仲尼修書不加增削非有深意也

甲子晉侯僝諸卒

公作甲戌僝
公穀作詭

冬晉里克殺

公作弒

其

君之子奚齊

驪姬嬖於晉獻欲立其子譖殺世子申生逐羣公子而奚齊得有晉國此國人之所欲得而甘心者也非里克殺之則無能殺之者矣聖人之心猶人人之心也豈其有愛於奚齊而不以殺之為快乎然而書殺其君之子奚齊不謂之罪里克不可也里克者晉之重臣欲中立以免禍則申生之死奚齊之立里克固亦不能辭其責矣乃獻公死嗣君之位既定而後殺之其事雖快於人心聖人猶不許也晉獻之昏驪姬

之惡申生之冤炳然灼然自當別論但據里克之事而斷之則受命於先君遭喪繼位里克以人臣而殺之所知者此而已其他非所知也則亦猶夫慶父之殺子般東門遂之殺惡而已不復論其為正嫡與否若國人子與不子也故曰春秋成而亂臣賊子懼者正以臣子之於君父不可與之校曲直是非而名義所在一或犯之而與乎亂賊之迹則雖自謂天下之賢人從衆人之望而行之所殺者為無道所立者為

能君有功於其國者甚大而聖人斷然加之以大惡之名不可以他事而望聖人之赦除之也雖欲不懼不可得已況此里克者中立於前而連殺二孺子於後又不得為賢乎故曰書殺其君之子奚齊不謂之罪里克不可也

十年春王正月公如齊

七年使公子友聘齊及此公自如齊始朝於桓也嗣是終桓之世朝聘不曠魯之事伯主勤矣桓莊如齊

皆非朝朝齊自僖始蓋葵丘之會天王使宰周公賜
胙於桓命無下拜所以崇重之者至矣於是東諸侯
之大者亦朝於齊不特曹許小國無敢後至而已齊
桓率諸侯以尊周室而諸侯之尊周室遠不如齊者
禍福利害之所由在伯主而不在天子也然則齊桓
之尊周乃其所以自尊而功首罪魁之論君子之責
備有由來也雖然天下之勢極重難反王畿削弱徒
守建空名藜蕭湛露之盛周亦自不能行之非獨諸

侯之罪也論世之士宜有考焉

狄滅溫溫子奔衛

溫畿內諸侯蘇子之都也見滅於狄以視伐邢入衛
抑又甚矣

晉里克弑其君卓

公有子字

及其大夫荀息

據左氏上年冬十月里克殺奚齊荀息立公子卓以
葬十一月克又殺卓荀息死之是二孺子皆未踰年
之君也而春秋於此年正月書里克弑其君者杜氏

以為從赴也夫奚齊卓子其為嬖孽一也殺奚齊而
不殺卓子人心猶不快也荀息能復立之則里克能
復殺之荀息之所立者人心之所不欲立也里克之
所殺者人心之所欲殺也使驪姬有三子四子而輒
立之而輒殺之無唯類焉天下後世猶莫之憐者以
驪姬之譖殺申生其志至憯不可得而容忍也然則
無問成君不成君而里克殺之聖人不唯不惡之固
亦將許之也然則晉人雖以踰年成君赴而特變其

例不以弑君書何為不可乎曰不可也雖使驪姬之惡更有甚焉奚齊卓子如衛朔之愬伋壽而里克殺之猶以弑書也不如是則立一君殺一君亂賊之禍無時而得息也故里克之殺二子比於他弑君者獨為人心之所共快而春秋則以一例治之雖欲不以弑書而有所不可者此春秋之所以為春秋也然則奚齊書殺其君之子卓書弑其君殺奚齊之罪為輕於殺卓然乎曰殺其君之子猶之弑也以弑未踰年

君為輕於成君者非春秋之意也書之者異從史例
爾至於科亂賊之罪則從同而已春秋書弑君及其
大夫者三孔父之義形於色也仇牧之不畏強禦也
荀息之不食其言也皆大臣之能死節者也荀息從
君于昏許君以死僅能不食其言與夫前二人者有
間矣而書法從同者荀息之罪在於探獻公之志受
獻公之命而為奚齊傅爾至於獻公死立奚齊奚齊
死立卓子卓子又死力不能殺里克而以其身殉此

其於忠貞之節其庶幾矣雖忠非所當忠貞非所當
貞然而君子之論至此則不復念其前非而但取其
死節可矣仲由結纓之義比於易箒為劣而以視夫
偷生苟免之徒則不可同年而語也孰謂苟息之死
而非聖人之所取乎苟息不正遇禍視孔父自然不
同但不可以名字之間而求聖人褒貶之意名猶字
也聖人何擇焉考其事實以定其是非邪正之歸是
在後人而已矣於史書一句一字之內而屑屑然著

人之賢不肖又使人諦視孰察而後見之者愚固知其不然也

夏齊侯許男伐北戎

北戎在齊之北即山戎也許男獨從伐者蓋許德齊甚自請效力於齊如江黃伐陳之類當時小國之情固如此北戎不聞為中國患然經傳所載甚畧未可橫斷齊桓此舉為非

晉殺其大夫里克

里克之弑二君為重耳也惠公入懼里克之復將殺已故殺之也所謂殺之不以其罪者故不以討賊之辭言之也惠公入不見經者春秋所錄本非國史全文難可責以備記無遺曲為訓說徒滋勞攘推測聖情轉見荒忽闕而不言斯為得矣

秋七月 冬大雨雪

公作
雹

蓋夏正九十月之間齊魯近北雨雪多有之以大書者寒甚有異於常或亦得為災爾若依公羊作大雨

電則災及人畜尤可不疑矣

十有一年春晉殺其大夫平鄭父

公羊疏云左氏經無父字公作邳

平鄭里克之黨也謀出惠公不遂而見殺春秋據事書之不以有罪無罪見義左氏所載里克不黨凡數人舉其貴者一人餘從畧此史家之例

夏公及夫人姜氏會齊侯于陽穀

此會非有諸侯之事直以昏姻之故行家人之禮爾然夫人不宜與公俱會於外直書其事非禮可知

秋八月大雩

夏之六月渴雨甚也

冬楚人伐黃

黃本屬楚慕齊桓之義遠從中國會盟而不共楚職
楚人伐之桓不能救也桓豈不欲救哉度其力不足
以及遠徒敝中國以與楚爭終莫能庇之故棄之而
不惜爾書者見夷夏盛衰之勢傷齊桓伯業虧損不
如盟召陵時也

十有二年春王三月庚午日有食之 夏楚人滅黃

冬以被兵告至是而諸侯之救不至遂為楚所滅也

前滅弦不書伐者弦不與盟會畧之又不踰時見滅

但舉重而已此先書冬伐者見弦之不救猶可無譏

而黃之見滅實為桓恥也

管仲尚存

秋七月 冬十有二月丁丑陳侯杵

公作處

白卒

十有三年春狄侵衛 夏四月葬陳宣公

楚人滅黃患未及中國也而為中國之恥狄侵衛侵

雖淺事未足深恥然兵戈交橫不可撲滅之勢於是為著前書日食天變人事信而有徵所謂天之方蹶無然泄泄者聖人之情具見乎辭矣

公會齊侯宋公陳侯衛侯鄭伯許男曹伯于鹹

據左氏此年秋為戎難故諸侯戍周則鹹之會自當為王室而致諸侯非專為杞謀可知

秋九月大雩 冬公子友如齊

十有四年春諸侯城緣陵

緣陵杞邑杞未遷而豫為之城不序諸侯者蓋即會
鹹之諸侯也既會之後諸侯各歸其國此言諸侯城
之者未必諸侯身自來或當各遣大夫帥師亦得言
諸侯城之也齊桓為伯久矣此等之事要為常常無
可大褒亦不應反加貶抑史家之例合從簡省亦無
怪焉

夏六月季姬及鄆子遇于防使鄆子來朝

穀作
繒

依左氏鄆季姬來寧公以鄆子之不朝也止之季姬

於是及其夫遇於防而要之使來朝非鄆子志欲朝
魯故言使也季姬前歸於鄆及來寧皆不書春秋內
女適人不書者多矣不足怪也季姬既見止示與鄆
絕若將更嫁者非實欲更嫁故故亦不繫以鄆也春
秋書諸國來朝見內勢尊重小侯盡事大之禮所以
為榮然亦不沒其實苟為夸耀情狀有異備見其文
如曹伯使其世子來朝後書其卒見曹伯病不能自
來非慢也杞伯姬來朝其子見子幼弱來朝者伯姬

為主也此季姬使鄆子來朝見鄆子失禮於我今此

來朝由季姬止之如曰鄆子挾恩恃愛既雅

衆雅且狂之雅

非謂如小

且闇不知事大之禮吾季姬責之使朝是亦於

內無損無庸於諱也然其不得為美事亦不假於言而見矣

秋八月辛卯沙鹿崩

春秋書災異最重莫如天而地次之沙鹿梁山崩變之見於地者何大如之故備日以志謹明王者父天

母地諸侯君國子民精氣相通譴告可畏沙鹿在晉地而不繫國者天地亦變當闕天下之故雖在彼國遇災知懼當引而同之

狄侵鄭 冬蔡侯盼卒

凡書侵書伐而諸侯不救者或彼國力足相當不煩
飲助未可每見一事便責伯主不能救之但裔不謀
夏而此狄連年見經侵衛及鄭則桓伯之衰亦可知
矣○蔡自見侵國潰後從楚如故中國會盟未有與

也故蔡侯之卒無月日畧之比於遠方小國亦史氏之常文非聖人賤之而去其月日也

十有五年春王正月公如齊

楚人伐徐 三月公會齊侯宋公陳侯衛侯鄭伯許男

曹伯盟于牡丘遂次于匡 公孫敖帥師及諸侯之大

夫救徐 公作率程端學本義云穀無衛侯二字公羊衛在陳上

徐自莊二十六年見伐之後服於齊者久矣僖三年

徐人取舒蓋倚齊以凌楚之與國至是楚伐之徐雖

夷也而於我為同好故此書楚伐徐諸侯救徐所以
內徐而外楚也牡邱之會本為救徐故又相與尋盟
而遂次於匡諸侯不自將也內之帥師者大夫公孫
敖也外諸侯亦皆使其大夫帥師而不序其人者詳
內而畧外也疆場之事難可踰度況在千載之前用
兵機宜益不可知救徐之役未知果合諸侯自行鼓
勇而前揚威江漢否也但以大勢而言則楚人至此
已若氣吞中原而齊桓伯業日就隳廢亦自可見矣

公子慶父之子稱公孫公孫敖之子稱仲孫為仲孫氏仲孫氏典兵始此

夏五月日有食之 秋七月齊師曹師伐厲

徐齊之與國也楚伐之厲楚之與國也齊率曹伐之

所以報也

厲在齊楚之間

八月螽

公作螽

九月公至自會

季姬歸于郕

盛夏之月蟲為災也 女子始嫁書歸于某此季姬

是中絕而遣歸其國故書法與始嫁同也紀叔姬歸

於鄗非嫁也亦書歸于嫌疑之際君子慎之亦寧失
不經之意云爾

己卯晦震夷伯之廟

九月之晦日雷擊夷伯之廟以天戒為重故詳書之
冬宋人伐曹

曹宋之細也為同盟之國且十有五年矣今而見伐
亦猶魯之伐邾欲加之罪則伐之而已爾諸夏自相
攻伐亦見齊桓之伯衰諸侯漸不奉其約束矣

楚人敗徐于婁林

前書諸侯之大夫救徐而徐竟為楚所敗則諸侯之不競亦可知已徐屬於諸夏故婁林之敗必書義同滅弦黃也


十有一月壬戌晉侯及秦伯戰于韓獲晉侯

此志秦晉交兵之始齊桓之伯衰矣而晉方亂此重耳之代興所以遲遲而宋襄得以承乏也秦伐晉而獲其君其君又秦所納也則秦繆之得備五伯之數

其跡亦隱然可見也凡此並是天下無道禮樂征伐
自諸侯出王室陵夷世變愈亟不可復振之事聖人
筆削至此不勝憂歎東周之志所盱衡者遠矣若夫
彼此曲直之情乃為細節傳有其文自可攷見聖經
簡要不屑屑于斯也韓晉地戰於韓則秦之來伐從
可知也兩君自帥師以戰而至於見獲則師之勝敗
自不須言晉師雖未敗而晉侯被獲為辱已甚非翅
於敗績亦可知也此與蔡侯獻舞書法不得同者上

言晉侯及秦伯戰晉侯之名理無可見下文獲晉侯亦不得與上異文獲晉侯不即釋之但言獲則以歸可知史筆謹嚴無庸贅也秦始見經而書法與晉為平交不似齊若楚之以夷夏為內外者晉雖宗盟大國獻公以來未嘗與中國之會秦雜西戎而其國乃豐鎬舊都繆公於五伯最賢孔子錄其誓辭於百篇之末非吳楚僭竊之比也故自晉文主夏盟之前以魯視秦晉則皆外也則又皆非荒裔也不容獨內晉

而尊之外秦而卑之也凡此並因當時事世而定其
文無庸以意揚抑於其間也



春秋闕如編卷四